

PASTI DAPOTAN HALUAHON

“Halani dapot nasiam tujuan ni haporsayaon nasiam, ai ma haluahon ni tonduy nasiam.”

1 Petrus 1:9

Bani sada panorang mardalan do au hu Medan naik kareta api. I lambungku sada inang, ilobeihu dua Bapa. Songon na gati tarjadi, age pe lang marsitandaan, ipungkah hanami ma parsahapan. Dob honsi marbuali, piga-piga dokah, na botoh ma paboa hatolusi sidea, aima halak Kristen. Sada bapa manungkun: Ai pasti do dapotan haluahon halak na porsaya bani Jesus Kristus? Jadi ningku ma dompak bapa ai: Ham sandiri ma lobei mambalosi sungkun-sungkunmu ai! Nini: Anggo manurut pandapotku, lang na botoh atap na pasti do dapotan haluahon, dapotni ijai ma, halani songon au, bahat ape dousangku.

Na dua halak nari ibagas kereta api, sonai do homa pandapotni. Anjaha anggo na sungkun buei halak Kristen, bahat do na marpandapot sonai. Anggo ukuran atap syarat-syarat haluahon ai ma pambahenan na madear gabe ragu do hita, gariada lang saud dapotan. Halani sintong do pardousa hita haganup.

Tapi haluahon ai sedo horjanta, horja ni Tuhan Jesus bani hayu parsilang i Golgata, marhiteihon hamateian-Ni. Anjaha aha na ihorjahon Tuhan Jesus sempurna do, lang pala be hita ragu. Na porlu ai ma porsaya. Porsaya do ham paboa Jesus do na paluahkon ham, manobus ham, mangkorjahon haluahon ai bamu? Anggo porsaya do ham, pasti dapotan haluahon. Halani ai hata ni Naibata sadari on: Dapot nasiam tujuan ni haporsayaon nasiam, ai ma haluahon ni tonduy nasiam.

**Tonggo:** *Ham Naibata ibagas Jesus Kristus, tarima kasih ma Bamu, halani domma hape ihorjahon Ham sandiri haluahonnami. Sai ulang be hanami ragu-ragu, tapi porsaya ma, ai Ham do haluahon ni tonduynami. Amen.*

HALELUYA NO. 142:4

4. Haporsayai ma Hata in,  
ai in do haluahon.  
Arapkon Tuhan Jesus in,  
Daroh-Ni in ma jolom.

Age gok dousa uhurmin,  
maluah do bahenon-Niin.  
Tongon, tongon,  
maluah baenon-Niin.

MANGGOLUH BANI NAIBATA

**“Sonai ma hira nasiam diri nasiam: Matei bani dousa, tapi manggoluh bani Naibata ibagas Kristus Jesus.”**

**Rom 6:11**

Dob na tangar ayat na i atas in, mintor adong do soal ibagas uhur diri: Sonaha do na matei ibagas dousa? Dousa ai ma sada hal na mambahenjolma hona uhum. Pardong ni dousa ai ma marhitei panlanggaron bani Titah ampa Hata ni Naibata, halani ai roh ma uhuman humbani Naibata, ai ma hamateian sadokah ni dokahni.

Sonaha ma dalan ase maluah hunjai? Ihatahon use bani kalimat na paduahon bani ayat na i atas in: “Tapi manggoluh bani Naibata ibagas Kristus Jesus.” Ase boi hita maluah humbani uhuman ai, ra ma hita rap matei pakon Tuhan Jesus ibagas dousanta. Akuhon hita ma ibagas uhurta, halani dousangku do ase itaron Jesus hamateian ai, ase dihut au marhapansingon halani daroh-Ni na pansing in.

Ai Tuhanta seng dong dousa-Ni, pansing do Ia. Tapi mase manaron Ia songon pardousa? Ai ma halani holong ni atei-Ni hubani na sihol maluah humbani dousa. Halani ai do ase ihatahon humbani hayu parsilang: Ham Bapa sasap Ham ma dousa ni sidea ai, ai lang ibotoh sidea na binahen ni in. Sonai homa bani Pandidion Napansing ai, marhiteihon pandidion ai ihira hita ma dirinta matei ibagas dousa tapi salpu ai margoluh na baru ma hita ibagas goran ni Kristus Jesus. Tapi adong do persyaratanni: Ulang be inunut mardousa, tapi ihagoluhkon ma panghopkopon ni Tuhan Jesus, ai pe ase boi manggoluh bani Naibata. Manggoluh bani Naibata ai ma sijalo idop ni uhur ibagas goran ni Kristus Jesus.

**Tonggo:** *Ham Tuhan Naibata, tarimakasih ma Bamu halani ibere Ham do goluh na baru bannami, marhitei na ipamatei Ham hanami ibagas dousa, tapi ipagoluh Ham hanami ibagas Kristus Jesus. Amen.*

**HALELUYA NO. 230:1-2**

- |                                                                                                                                                 |                                                                                                                                            |
|-------------------------------------------------------------------------------------------------------------------------------------------------|--------------------------------------------------------------------------------------------------------------------------------------------|
| 1. Sai ijalo Jesus in<br>do pardousa na tariluh.<br>Ambilankon Hata in<br>bai ganup halak na kahou.<br>Ase haganup na roh<br>ipagoluh Jesus do. | 2. Idop ni uhur-Ni in<br>pinarbagah ni Hata-Ni,<br>Ampa hagoluhan in<br>sadokah i lambung-Ni.<br>Haganupan na roh in<br>ipagoluh Jesus in. |
|-------------------------------------------------------------------------------------------------------------------------------------------------|--------------------------------------------------------------------------------------------------------------------------------------------|

URASONKU DO SIDEA

**“Urason-Ku do sidea humbani haganup hajahaton ni sidea, na binahen ni sidea dompak Ahu, anjaha sasapon-Ku do haganup panlanggaron ni sidea ampa panlawanon ni sidea na dompak Ahu.”**

**Jeremia 33:8**

Malas do uhur manangar hata ni Naibata, ai ma songon ayat na i atas in. Tapi ise na botul marmalas ni uhur humbani na manangar ai? Ai ma na dob manandai hajahatonni, na dob mangidah bahatni panlanggaronni, anjaha siholan ia bani hatuahon gabe marubah humbani hajahatonni ai

Bani sada huta adong ma sada halak na marbaju silopak, anjaha i sangkotkon do baju ai. Anggo laho borhat ia hu tiga ibuat ma baju ai humbani sangkotan ai, janah dob mulak ia isangkotkon use i sangkotanni songon na biasa. Sonai ma tong somal ibahen. Dear do tong ididah rupani, lang sadar ia irumah ai marhullot do tong timus ni apuy tiap-tiap marapi. Dobni longkot ma timus ni apuy ai bani baju ai nanget-nanget, gabe roh gergerni ma baju ai. Bani sada panorang laho ma ia hubani sada tukang dobi iarahkon hasomanni, gabe iidah ma ijai na songon kaen ni bajuni ai, lopak tumang rupani. Tarsonggot ma ia, nini ibagas uhurni, na dob tapparapuyon do hape bajungkon. Pusok ma uhurni, ai lang mampan be sabun hunjai. Dobni maila ma ia mamakei bajuni ai anggo laho hu tiga atap anggo ididah hasoman ia mamakei baju ai.

Domma ihatahon Naibata “Urason-Ku do sidea,” tapi anggo lang na idah aha do siurason-Ni ai humbandiri, lang marguna hata ai bandiri. Tapi anggo gati roh diri hubani ianan na mapansing, hu parmingguan, partonggoan atap partumpuan ni halak Kristen, ra na idah ma habutakon pakon hajahaton diri. Dobni ra ma hita ipapasing hata pakon idop ni uhur Jahowa marhitei Jesus Kristus, ase marhapansingon hita.

**Tonggo:** *Ham Tuhan Naibata tarimakasih ma isombahkon hanami hu Bamu, halani iparsinta uhur-Mu do sihol mangurasi ampa papansingkon hanami humbani hajahatonnami. Pargogohi Ham ma hanami laho mangkagoluhkon pangurasion-Mu ai. Amen.*

**HALELUYA NO. 149:1-2**

1. Ham Sipagoluh au  
parayak Ham au on.  
Sai ulang Ham mandaoh  
humbagas uhurhon.  
Roh Sipagoluh roh tongon,  
baen Ham au anak-Mu tongon;  
Bani daroh-Mu usah au,  
putih songon bunga ma au.  
Putih tongon, putih tongon,  
bani daroh-Mu usah au,  
putih songon bunga ma au.

2. Gogoh ni daroh in,  
patorang bangku on!  
Tonduy, Pargoluh in,  
manogu au tongtong!  
Roh Sipagoluh, roh tongon,  
baen Ham au anak-Mu tongon;  
Bani daroh-Mu usah au,  
putih songon bunga ma au.  
Putih tongon, putih tongon,  
bani daroh-Mu usah au,  
putih songon bunga ma au.

DOMMA IPAPANSING

**“Anjaha sisonai ai do nasiam deba lobei. Tapi domma nasiam iburihi, domma ipapansing, domma ipintori marhitei goran ni Tuhan Jesus Kristus ampa marhitei Tonduy ni Naibata.”**

**1 Korint 6:11**

I lobei ni ayat on buei do igorani Apostel Paulus parlahou ni na so porsaya ai ma habutakon ni uhur, parbangkison, hasipajuh begu-beguon, paruhur haut, parmabukon, panipuon pakon na manrisai na legan. Anjaha ihatahon Apostel ai: Seng sitean Harajaon ni Naibata halak sisonai ai. Tapi ihatahon use bani ayatta on: Sisonai do nasiam ijia deba. Anggo ihatahon sonai maksudni ai kuria ai na roh do ai humbani na so mananda Naibata. Usih do ai songon hita na i Simalungun, Kristen na roh humbani parbegu.

Aha do sibahenon ase boi maluah humbani parlahou na so madear na nigoran nongkan ai? Humbani dirinta lang tarpaluah hita dirinta, tapi domma roh Kristus Jesus hu dunia on, patalarhon habutakonta ai, ipaidahkon hubanta dousanta ai, gabe ididah hita ma jangin ni dousa ai. Anggo domma ididah hita jangin ni dousa ai pakon kejamni, roh ma hita hubani Tuhan Jesus ibagas unduk ni uhur mangakuhon: Pardousa do au. Dob ai boi ma ahapkononta, domma iburihi daroh-Ni na pansing ai hita. Domma ipapansing hita humbani haganup habutakonta ampa hajahatonta. Dob ai ipasorap ma Tonduy-Ni hubanta, ase totap hita marhapansingon, anjaha magigi ma hita mangulaki parlahou sapari, horja hagolapan na so harosuh ni Naibata.

Ai marhite Tonduy Napansing do hansa ase boi ihorjahon jolma hapansingon na hinarosuhkon ni Naibata, anjaha anggo tarhorjahon hita ai bani goluhta on idop ni uhur ni Naibata do ai hubanta. Ai ma hataridahanni na dob ipapansing hita marhitei idop ni uhur-Ni ibagas Jesus Kristus.

**Tonggo:** *Ham Tuhan Jesus, paidahkon Ham ma humbannami sagala horja na lepak na dob ibahen hanami, ase marhitei gogoh na hum Bamu boi itadingkon hanami in. Paahapkon Ham ma bannami na dob ipapansing Ham do hanami humbani dousanami. Amen.*

**HALELUYA NO. 130:4-5**

4. Domma mogap ganup dousanta  
bai darohni Tuhanta in.  
Ai anggo porsaya do hita  
seng bulih hona uhum in.  
Ibaen hata ni daroh in  
na mangkahui jolma in.

5. Halani ai unobkononku  
do au bai paridian in.  
Hupasasapkon ma dousangku  
bai Jesus Sipagoluh in.  
Anggo manolsol diri au  
bai Jesuskin tongtong au lao.

HUAJARI PE HO

“Huajari anjaha Hupodahi pe ho pasal dalan sidalananmu, Huparmaloi anjaha iiring-iring pangkawah-Ku pe ho.”

**Psalmen 32:8**

Usih do songon na mardalan na madaoh pardalanan ni goluhta i tanoh on, sipata ra do songon na ngayotan, sipata ra do salah jalan, lepak sirpang na dalani pakon na legan. Bani panorang sisonai ai homa hotop buei tenaga sukarela menjadi guru pangajari bandiri, tapi isi ni pangajaran ni ai, lang marisi haluahon. Lang dong ijai hatuahon ni na niajaranni ai. Anggo sonai ise do panungkunan, anggo porini dong na lepak atap paruntolon i tengah dalan, bani goluh on? Porlu lobei ingatonta, laho huja do hita on? Halani anggo laho hu juma do diri, na mambotoh soal juma do na sungkun, ase dapot balos na sintong diri pasal ai. Sonai ma homa anggo laho hu surga do diri, tontu hata ni Naibata do panungkunan pasal ai. Hata ni Naibata na dob ginuruhon, atap na dob tinangar, dob na balosi pe ai, na botoh na iajari Naibata diri bani sidalanan ari-ari.

Anjaha anggo lang dong na mahol ibagas goluh on, sipata lang na ahapkon pangiring-iring ni pangkawah ni Naibata hubanta. Tapi ulang ma hita mambahen mahol sidalananta. Tapi anggo na roh hundarat do sitarononta ai pos ma uhurta Naibata do manramotkon hita ijai.

Bani sada kota na ramei dong ma ijai sirpang opat. Dalan na banggal do ai, halani ai buei do ijai na mamontas tarlobih ma ai motor pakon na legan. Roh ma sada halak na so onnga mamontas hunjai, gabe gobir ma ia, halani seksuk ni na marsilaosan bani sirpang ai. Tapi ikawahkon ma hu pinggir ni dalan ai, ididah ma ijai tolu halak Polisi lalu lintas. Dob ididah ai tenang ma ia, ai dong do hape na manramotkon au nini uhurni. Sonai do hita na i dunia on, mardalan bani sirpang na bolag anjaha buei do ijai na masa. Tapi pos ma uhurta dong do na manramotkon hita ai ma Naibata Bapa pakon Naibata Anak ampa Tonduy Napansing.

**Tonggo:** *Ham Tuhan Naibata Bapa pakon Tuhan Jesus ampa Tonduy Napansing, ajari Ham ma hanami mandalani goluhnami ari- ari ase das hanami hu Bamu. Amen.*

**HALELUYA NO. 48:1-2**

1. Naibata hasomanmin,  
lao mangkorjahon horjamu.  
Ia do pangajamanmu,  
sai patoruh uhurmin.  
Naibata hasomanmin!  
Naibata hasomanmin!

2. Naibata hasomanmin!  
Anggo rapkon Naibata do,  
seng tarbahren ho be kahou,  
sai torang do langkahmin.  
Naibata hasomanmin!  
Naibata hasomanmin!

PARJUANGAN

**“Marsijoloman bani hata hagoluhan in, bahen puji-pujian bangku bani ari ni Kristus, paboa na so soya parlumbaonku anjaha sedo na so marguna halojaonku.”**

**Pilippi 2:16**

Sahali sanggah marlajar hanami i luar negeri, na jalo do surat humbani keluarga i Indonesia on mangkatahon sonon: “.... age pe sonai pabulat ham ma uhurmu, torus ma berjuang, sabou do sitarononnam i na daoh humbamu martahun-tahun asal ma sukses studimu.” Tertegun do diri mambasa ai, apalagi mambayangkon sonaha situasi ni keluarga na daoh humbani bapa.

Usih hujai do homa boi idahonta bani teksta on, ai ma pangindoan pakon pangarapan ni si Paulus bani kuria Pilippi ai. Lang soya sitarononni, pardakdak, iarsik-arsik, tartutup pakon na legan, anggo sirsir do kuria ai manghagoluhkon Hata ni Naibata na dob ipadas bani sidea. Tontu boi hatahononta, lobih sonai do Tuhanta homa asal ma sirsir na hinopkopni in manghagoluhkon haluahonni.

Teks on ai ma sada bagian humbani ojur-ujur ni si Paulus hubani Kuria Pilippi ase hot sidea mangkagoluhkon ha-Kristenonni. Ai ma marhitei parlahou na pitah, ulang marsipakulah-kulah, ase totap marsinondang itongah-tongah ni dunia na golap ai, janah na gabe bohal bani sidea mandalankon ai, ai ma marsijoloman bani Hata ni Naibata! Anggo isobut marsijoloman, tontu lang be passip tumang ai, tapi domma pataridahkon “Keaktipan” ibagas na manjolom Hata ni Naibata. Misalni, anggo inai hita sada kenderaan na doras pardalanni, ningon do poltik panjolomta ase ulang madabuh hita. Atap sada halak perenang na mamakei pelampung ningon do hot panjolomni, ase ulang talu atap harom ia.

Sonai do homa kuria ni Tuhanta ningon poltik marsijoloman bani Hata ni Naibata ase boi marsaksi i dunia on. Ningon marsinondang sidea i tongah-tongah ni dunia na golap on! Anggo boi ma sonai, gabe malas ni uhur ampa puji-pujian do ai bani si Paulus na pala manaron halani sidea. Tontu lobih sonai ma age Tuhanta na pala manaron, matei manghopkop hita.

Lang soya sitaronon-Ni, janah gabe malas ni uhur do ai anggo sirsir hita mangkagoluhkon pakon manaksihon Hata-Ni bani ganup situasinta.

**Tonggo:** *Hata-Mu ma Tuhan sijoloman bennami mangkagoluhkon haluahon in, ase ulang soya sitaronon-Mu manghopkop hanami. Amen.*

**HALELUYA NO. 205:4+6**

4. Hata hagoluhan do nuan  
iboan Parambilan in.  
Na lampot tangaron, in do  
iberehkon bai uhurta in.  
Ipodahi hita on  
ihatahon bei do hita  
paubah uhurta.

6. In nuan onjolan na totap  
manahan sadokahni in.  
In hajongjonganku,  
in pangajamanku hagoluhankin.  
Sai totap ma gogohkin  
mangirikkon bai Hata-Ni,  
lao pasaud rosuh-Ni.



HALUAHON PAKON PANDILOON

**“Ai ipaluah anjaha idilo do hita marhitei pandiloon na mapansing, sedo halani pambahenanta, tapi mangihutkon sura-sura ampa idop ni uhur-Ni do, na binere-Ni banta ibagas Kristus Jesus, humbani mulani nari.”**

**2 Timoteus 1:9**

Hamerdekaon pakon pandiloon ai ma dua pahara na lang tarsirang bani ganup warga negara ni sada-sada bangsa. Na so merdeka tardilo do, laho ma mardekahon negarani, tapi na dop merdeka pe torus do manramotkon negarani. Janah on do siporlunan, tardilo do laho mewujudkon isi atap cita-cita ni kemerdekaan ai, ai ma kehidupan na adil janah makmur.

Ibagas Harajaon ni Naibata pe hal on do homa na porlu. Haluahon pakon pandiloon lang tarpisah ai humbani goluh ni na porsaya in. Songon na tangkas iondolhon si Paulus hubani si Timoteus bani teks on. Peristiwa na banggal anjaha bersejarah do haluahon ai, bahkan idop ni Naibata do ai bani jolma. Halani ai patut hargahononta ai. Janah na dob ipaluah, tardilo do ase aktip mangidangi, marsaksi ibagas kuria in.

Si Timoteus ai ma juak-juak ni Naibata na mangidangi i kuria-kuria i Asia na etek pakon sekitarni. Na poso-poso ia, sada halak na bujur anjaha na ringgas, susian hinaholongan ni si Paulus. Tapi halani buei ni persoalan-persoalan i kuria in, sonai homa bani panorang ai daoh do ia humbani si Paulus gabe galek do ia ibagas pengidangionni. Halani ai ipagolpa si Paulus do ai pasal haluahon na ilayak-layakkon Naibata, tarlobih bani pandiloon in. Anggo idingat anjaha ihagoluhkon si Timoteus do ai, margogoh do ia mandompakkon haganup na masa ai.

On do homa ipindo hata on age humbanta. Marhitei na masa bani goluhta, hotop do hita lupa bani haluahonta. Hotop do lang ihargahon hita haluahon in anjaha hotop do hita lupa bani idop ni uhur ni Naibata na paluahkon hita. Lobih hunjai homa, hita na dob ipaluah tardilo do homa laho pasaudkon isi ni haluahon ai. Tardilo laho mangidangi ase dihut halak na legan manjalo haluahon ai. Janah haluahon pakon pandiloon ai idop ni uhur ni Naibata do ai bani jolma pardousa in. Pandiloon na mapansing do ai janah ai do sura-sura ni Naibata, ase ganup na dob ipaluah in sirsir mandalankon pandiloon in ibagas pangidangion, hasaksian pakon goluhni. Ase sungkun-sungkun hubanta, sonaha ma hasirsironta mandalankon dilo-dilo ni Naibata tanda ni na ipaluah hita?

**Tonggo:** *Tongtong ma paahapkon Ham bennami o Tuhan, haluahon na dob binere-Mu in, anjaha pargogohi Ham ma hanami mandalankon dilo-dilo-Mu laho pasaudkon rosuh-Mu. Amen.*

**HALELUYA NO. 494:1+3**

- |                                                                                                                                                                 |                                                                                                                                                                           |
|-----------------------------------------------------------------------------------------------------------------------------------------------------------------|---------------------------------------------------------------------------------------------------------------------------------------------------------------------------|
| <p>1. Roh ma ham idilo Jesus,<br/>bani pesta malas uhur,<br/>ipasirsir do banta pargoluhon.<br/>sipanganon sonai 'ge parhiouon.<br/>Roh ma ham idilo Jesus.</p> | <p>3. Sai tangihon ma Hata-Ni,<br/>in ma baen goluh-ni tonduy<br/>Ase ulang jiris itongah dalan,<br/>lanjar himong manrarat gabe tonjan.<br/>sai tangihon ma hata ni.</p> |
|-----------------------------------------------------------------------------------------------------------------------------------------------------------------|---------------------------------------------------------------------------------------------------------------------------------------------------------------------------|

TOTAP IBAGAS HOLONG NI KRISTUS

**"Ise manirang hita humbani holong ni uhur ni Kristus? Hamarsikon do atap hasosakan, parburuon do atap lohei, hatalanjangon do atap mara atap podang do?"**

**Rom 8:35**

Bani ganup panorang iperhadapkan do jolma bani pilihan antara na madear pakon na masambor, na jenges pakon na lang jenges, na pintor pakon na so pintor, na positip pakon na negatip. Janah lang pitah ai, na dua hal na iatas in, hotop gabe dua kekuatan na saling bertentangan anjaha marusaha manarik jolma in hubani pihakni bei.

Ibagas ha-Kristenon pe, iperhadapkan do hita bani pilihan antara na madear pakon na masambor, rosuh ni Naibata pakon rosuh ni dunia on Tarlobih bani situasi Jemaat Rom, aktuul botul do masalah on. Songon na icatat ahli-ahli sejarah, bani panorang ni Kaisar Nero pakon Domitianus mamarentah ijai, buei tumang sitaronon ni halak Kristen ibagas pardagingon pakon partonduyon. Buei halak Kristen na korban halani haporsayaonni, janah adong do homa na murtad na so tahan bani sitaronon ai. "Gabe Kristen bani panorang ai." nini ahli sejarah "ningon barani mempertaruhkan hosah. Pangarsik-arsikon, pangayak-ayakon, tekanan-tekanan das hubani pamunuhon ialami halak Kristen in, tapi age pe sonai lang tarambati dunia on pardalan ni Harajaon ni Naibata. Sintong ma hata ni Bapak Gereja mula-mula ai: "Darah orang martir adalah benih dari Gereja."

"Ise manirang hita humbani holong ni Kristus?" nini si Paulus, mararti lang pitah sungkun-sungkun, sekaligus gabe pernyataan. Na so hasirangan be na porsaya in hunjai. Age pe marhitei hamarsikon, hasosakan, lohei, hatalanjangon pakon podang. Boi sonai halani na porsaya in domma gok marondos bani Tuhanta janah mangahapkon arganan do Jesus ase haganup na adongi tanoh on. Janah Kristus na dob monang in do na gabe jaminan untuk ai.

Sungkun-sungkun sonari banta, sadar do hita bani ganup ancaman na sihol parsedahon haporsayaonta? Sintong do na lang tarsilang na masa i tanoh on be pardomuanta pakon Tuhan in? Bani ganup panorang ni goluhta ise do na monang, sura-sura ni Naibata do atap sura-sura ni dunia on?

**Tonggo:** *Pargogohi Ham ma hanami Tuhan mangkamonangkon rasuh-Mu i dunia on. Tonduy-Mu ma pasaudkon in bani goluhnami, ai holong-Mu do na totap ronsi sadokah ni dokahni. Amen.*

**HALELUYA NO. 102:3**

3 Atap aha pe na masa,  
malas uhur, pusok pe,  
Jolomanku na mangharga  
na marholong atei pe;

Ai Sadokah au manggoluh  
'ge dob bois bohalhon  
Ningon Ham, o Sipagoluh.  
Pujionku sai tongtong



PAMBAHENAN NI NAIBATA

**“Anjaha on do Titah-Ni, ase porsaya hita bani goran ni Anak-Ni Jesus Kristus, anjaha marsihaholongan hita, songon na dob tinonahkon-Ni ai banta.”**

**1 Johannes 3:2**

Sada goran ibagas goluh ari-ari banggal do artini, anggo itanda hita goran ni sada halak, bahat pasalni na boi iarusi hita. Goran ai patandahon hubanta, marga aha ia. Goran ni ai lang be goran na asing banta.

Sanggah idilo Naibata si Musa i halimisan laho paluahkon bangsa-Ni hun Masir, isungkun si Musa ma goran-Ni. Jadi ibalosi Naibata: “AHU ADONG na AHU ADONG.” (2 Musa 3: 14) Ipatandahon ma diri-Ni marhitei halongangan ai; maluah ma bangsa-Ni. Apostel Johannes mandilohon hubanta, ase porsaya hita bani goran ni Anak ni Naibata, ai ma Jesus Kristus. Humbani goran-Ni on domma ibotoh hita, parholong atei do Ia janah halayakon do hadirion-Ni.

Maridop ni uhur do Naibata mangidah pambahenan ni jolma na so ra mulak hu Bani. Janah isuruh do Anak-Ni in hu dunia on, mambahen hubungan use hubani jolma manisias. Panaronon, hamateian pakon parpuhoon-Ni ai ma hadirion pangungkabon ni Naibata. Janah domma ibotoh hita, Naibata ni Naibata na layak in do ompungan ni hita jolma manisias. Tapi pambahenan ni Naibata na layak in manuntut sada balos hubanta. Ipangindo do ase ipatalar hita holong ni atei-Ni ai bani goluhita ganup ari, janah ase manggoluh hita mardomu hubani na dob jinalonta hum-Bani: “Marsihaholongan ma hita!” Urah iluarhon, tapi borat idalankon bani situasinta bei. Tangkas ibotoh hita, paboa hotop iparnalang hita goran ni Naibata, gabe sangsi ma hasoman jolma mangidah hita, ai lang be sadalan hatanta pakon pambahenanta

Paruhurhon hita ma holong ni atei ni Naibata sadari on, ai ma marhitei na hinatahon ni Apostel Paulus bani 1 Korint 13: “Na sabar do haholongon in anjaha basar, seng subil haholongon in, seng mangunsagah....” Pakon pondok: Ipindahi do tongtong na madear bani hasoman jolma!

Marhitei ayat sadari on iarahkon Naibata do hita use, ase ganup ari mardingat hita bani pambahenan-Ni ai dompak hita jolma. Ai hunjai do ijalo hita gogoh pakon pangurupion mambalosi Titah-Ni ai.

**Tonggo:** *Ham Bapanami, pabagas Ham ma pangarusion pasal pambahenan-Mu dompak hanami jolma bani uhurnami marsada-sada, ase lambin tangkas itandai hanami goran-Mu na pinatalar-Mu marhitei Anak-Mu Jesus. Ambukkon Ham ma humbagas uhurnami ganup na so mardomu hubani idop ni uhur-Mu, ase gabe parhiteian bani holong ni atei-Mu hanami dompak hasomannami sadarion. Amen.*

**HALELUYA NO. 126:4-5**

4 O Tuhan, sai na puji ma goran-Mu  
ai ipagoluh Ham do hanai on!  
Tandaon nami ma pambahenan-Mu  
dob ipalihar Ham panonggor on.  
O Naibata, holong ma uhur-Mu,  
manogu hanai na ngalutan on.  
Holong ma atei-Mu bannami on,  
'se ondos hu Bamu bahenon-Mu.

5. Jahowa, sai pasabou Ham uhurhu,  
mangkamalahon na binahen-Mu.  
Ajari au, patorang Ham langkahku,  
lao mangayaki Ham hu surga-Mu.  
Sai ulang lopas Ham be kahou au,  
pasorap Tonduy-Mu bai uhurhon.  
Mangiring-iring au i tanoh on,  
ronsi na ondos au hu lambung-Mu.

HINSAH NI UHUR

“Ai pe, ulang ma ambukkon nasiam hinsah ni uhurnasiam, ai bangga do upah balas ni in!”

Heber 10:35

Bahat keluarga na marsitaronon halani ai lang adong be hinsah ni uhur bani sidea laho marsiarusan. Bapa pakon inang kecewa mangidah niombahni hotop mangindahi dalan sandiri do sidea. Kecewa homa niombahni, halani na so sirsir orangtuani ai mambalosi pangindoanni. Pangkorhonni ai roh dokahni maseda hubungan ni sidea, jadi magou ma hinsah ni uhur. Marsibuat dalanni bei ma sidea. Sasintongni humbani goluh siganup ari iidah hita do hinaharga ni hinsah ni uhur laho pajongjongkon parsaoan na totap.

Hubani halak Kristen na i tengah dalan laho manuju tujuan na pinarbagah ni Naibata ihatahon panuratni Surat Heber do golpa-golpa on: “Ulang ma ambungkon nasiam hinsah ni uhurnasiam!”

Hinan domma ipataridahkon Naibata holong ni atei-Ni hubani Bangsa Israel, Ia do mardalan i lobei ni sidea, arian marhitei hambun na jongjong mambobahon sidea i dalan ai, borngin marhitei apuy na jongjong bahen suluh bani sidea. Tapi age pe bahat tanda ni idop ni uhur ni Naibata na dob ijalo sidea, urah galek sidea manghaporsayai Hata-Ni ai janah magou homa hinsah ni uhur. Mangkawah sidea bani sitaronon hansa, janah daoh use Naibata iahapkon sidea.

Humbani pardalanan ni bangsa Israel iidah hita halojaon hinorhon ni na so marhinsah ni uhur dompak Naibata. Tapi tarimakasih ma, seng marnaloja Naibata atap ngayotan pataridahkon holong ni atei-Ni dompak sidea! Tongtong marhinsah ni uhur do Ia laho pabagashon haporsayaon ni sidea.

Das bani panorang on totap do idop ni uhur ni Naibata. Halani ai atap aha pe na masa, poltik ma jolom hita haporsayaon na dob ondos banta. Martuah do halak na mambahen Jesus arihanni.

**Tonggo:** *Tuhan Naibata, itandai Ham do hanami. Hotop usih hanami songon arung-arung na meol-eol do ibahen pangombus ni logou. Paingat Ham ma hanami bani holong ni atei-Mu na bangga in, ase hinsah uhurnami, ai Ham do simada hanami. Amen.*

HALELUYA NO. 207:3-4

- |                                                                                                                                                                                                                               |                                                                                                                                                                                                                         |
|-------------------------------------------------------------------------------------------------------------------------------------------------------------------------------------------------------------------------------|-------------------------------------------------------------------------------------------------------------------------------------------------------------------------------------------------------------------------|
| 3 Sai martuah ganup hita,<br>na mambahen Jesus arihanni in.<br>Ambit sai tongtong ra hita,<br>martenger ni uhur bai Tuhanta in.<br>Ham, o Jesus, sai patoguh<br>hanai na i parporangan.<br>Ase jumpah bai ujungni hamonangan. | 4. Sai tangihon Ham, o Tuhan,<br>anggo roh martonggo hanai on Bamu<br>Pasu-pasu marlobihan,<br>bereonkon-Mu bai na roh hu Bamu.<br>Hasomani Ham hanami,<br>Ase hot bai parpadanan,<br>Ase ondos hanai on bai hagoluhan. |
|-------------------------------------------------------------------------------------------------------------------------------------------------------------------------------------------------------------------------------|-------------------------------------------------------------------------------------------------------------------------------------------------------------------------------------------------------------------------|

BALOSTA

“Sihol ma marhitei horja na madear pasipon nasiam haotoon ni halak na hurang uhur.”

1 Petrus 2:15

Anggo haotoon ni halak na hurang uhur ibalosi hita homa marhitei hata atap pambahenan na patuduhkon hurang ni uhur, tarjadi ma partinggilan, hageoron, habadoran pakon borit ni uhur songon apuy na pajumpah pakon minak, gara ma! Marhitei sikapta sonon lang moru haotoon ni halak na hurang uhur, tapi lambin bagasni do, lambin hengkenngni. Jalan keluar humbani persoalan lang dapot. Anggo ibalosi hita marhitei hata na dear ra lang boi tarjalosi.

Anggo sonai sonaha do sikap humbanta na iharosuhkon Naibata marimbang halak na hurang uhur?

Naibata mangkarosuhkon ase haotoonni ai ipasip hita. Tahan emosi, jangan terpancing. Sip ma hita, tapi lang sip na manadingkon, lang sip na manundalhon, tapi sip na marpambahenan, ai ma marhitei horja na madear. Hahonaonni tarlobih hubani halak na hurang uhur ai. Horja na madear, ai ma balosta mangimbang haotoonni, anjaha ai ma homa ambilanta mangimbang hurang ni uhurni.

Songon bapa na mangajari anakni na hurang marpambotoh marhitei sada contoh atap pambahenan na madear, sonai ma sihorjahononta mangimbang haotoon ni halak na hurang uhur, anjaha andohar marhitei ai dapotsi parlajaran humbani haotooni na mangkorhon hamubahon.

Horja na madear, ai ma ambilan tang sijengesan!

**Tonggo:** *Ham Tuhan Naibata, lang adong gogohnami anjaha lang tuk uhurnami mangkorjahon na madear marhitei dirinami. Pargogohi Ham hanami ase marhitei horja na madear in lambin marsangap goran-Mu. Amen.*

HALELUYA NO. 234:1+4

1. Marigat langit ni langitan  
ibahen holong ni uhur-Mu.  
Bannami ganup na boritan,  
patalar Ham ma holong-Mu!  
Ididah jolma haganupan  
pangisi ni dunia on:  
Ai roh do Ham tongon, o Tuhan,  
manghopkop ganup jolma on.

4. Sai Ham ma tong simada ahu,  
sadokah au i tanoh on;  
Sai tong dear ma parlahouhu,  
pasangap goran-Mu tongtong.  
Binahen-Mu sai usihanku,  
mangkaholongi jolma in.  
Galangkononku ma diringku,  
lao mangusihi Tuhankin.

## PARMAHAN NA MADEAR 12 OKTOBER

### TANDAI TUHANMU!

**“Nini sidea ma bani puang-puang ai: Seng be halani hatamai mambahen porsaya hanami. Domma itangar hanami sandiri, anjaha ibotoh hanami, Ia do tongon sipaluah dunia on.”**

**Johannes 4:42**

Biri-biri na madear ai ma biri-biri na tangkas manandai parmahanni, sonaha rupani, pardalanni pakon sorani. Lang pala ajaran biri-biri na madear mananda parmahanni halani domma dokah iparorot pakon ijagai parmahan ai.

Domma dokah hita ibagas hulanen ni Tuhan Jesus. Parmahan Na Madear in. Domma dokah hita iparmahani, iparorot ibagas goluhta ari-ari. Domma itandai ham sora-Ni, holong-Ni pakon sonaha panghopkop-Ni?

Ulang ma panandaionta bani Tuhan Jesus songon panandaion ni buei halak bani Presiden na marhitei surat kabar pakon televisi hansa. Tapi marpanandaion ma hita hu bani halani adong hubungan pribadi, halani onggga adong kontak atap urusan pribadi hu bani.

Ulang ma itandai hita Tuhan Jesus songon sipaluah hansa, tapi sipaluah ham, sipaluah hita. Ulang ma itandai hita Tuhan Jesus songon sipanghopkop hansa, tapi sipanghopkop hita. Ulang ma Tuhan Jesus itandai hita ibagas ambilan pakon hasaksian ni jolma hansa, tapi itandai hita ibagas goluhta ari-ari songon sada halak na dob marpambahenan. Ase porlu do banta mangkawah use hu pudi, bani panorang na dob lopus, anjaha marpanungkun hita pasal aha ma na dob ibahen Tuhan Jesus hubanta. Holong pakon panghopkop, ai do na dob ijalo hita, rup atap marsada-sada. Hunjon ma hita boi mangkatahon: Domma itangar hanami, domma ibotoh hanami anjaha domma iahapkon hanami, .... Ia do tongon sipaluah dunia on, onjolan ni sagala pangarapan na adong banta.

**Tonggo:** *Ham Tuhan Jesus, ajari Ham hanami, ase lambin itandai hanami sonaha pangkaholongi-Mu hubennami, anjaha marhitei ai lambin ibotoh hanami martarimakasih hubani Bapa na marsuruh Ham. Amen.*

### HALELUYA NO. 248:4-5

4. Na kahou au anjaha pitung,  
ase lang hutandai Ham;  
Boratan au ibaen huusung  
ganup dousangku dompak Ham;  
Nuan pe hutandai ma,  
Ham arta na harga.

5. Tarima kasih ma uhurhu,  
Bamu na manondangi au;  
Hupuji Ham, ale Tuhanku,  
itodoh Ham hapeni au;  
Megah ma tonduyhin nuan,  
dob hutandai Ham.

TORUH NI UHUR

**“Sada ma uhur nasiam samah nasiam; Ulang ma hagijangon ai pingkiri nasiam, tapi hatoruhon ma parayak; Ulang ma na pandei nasiam iagan uhur nasiam.”**

**Rom 12:16**

Sonon do sapari sada hasomalan bani sada huta: Dob salosei sidea marpariama na madear, ija bahat, banggal janah tobu ma buah-buahan na ipatumpu sidea humbani kobunni, ipuji sidea bei ma dirini i kode: marhiteihon hata na sonon: Hasil ni horjangku sandiri do anggo buah-buahan na mantin on. Tapi anggo pariama na hurang dear, artini otik, etek janah asam ma buah-buahanni, legan do na ihatahon i kode, nini Tuhan Naibata do na paturut ma sonai hansa hasil ni pariama sahali on. Hotop usih hujai do sifat ni uhurta homa. Haganup hamajuon, hapandeion, arta pakon buei hal-hal na legan, ihira hita songon hasil ni horjanta sandiri. Tapi hun segi na legan salahta sandiri lang ra hita mangakui. Anjaha hasosakan boi mangkorhon sangsi ni uhur dompak hinadear ni panogu-noguon ni Naibata banta.

Paubah hita ma hauhuronta dompak Naibata. Torih hita ma sibere-bere-Ni ibagas haganup na madear. Anjaha torih hita ma salah ni jolma, tarlobih salahta sandiri, na mangkorhon buei ni hasunsahan banta pakon bani halak na legan. Toruh ni uhur na sintong boi iguruhon hita humbani Tuhan Jesus Kristus. Ia na patoruh diri-Ni manghopkop hita. Uhur na gok hatarimakasihon dompak-Si do na boi mamboban hita hubani toruh ni uhur na sintong, na mangidah hasadaon pakon haganup jolma na hinaholongan ni Tuhanta. Toruh ni uhur sisonai ai mangurupi hita bani голуhta ari-ari i rumah tangga sonai age i tengah ni kuria, atap i masyarakat.

**Tonggo:** *Ham Tuhan Jesus, togu Ham ma uhurnami hubani toruh ni uhur na hum Bamu. Ase iguruhon hanami toruh ni uhur na hinarosuhkon-Mu janah ase dapot hanami hasadaon i tengah- tongahnami. Amen.*

**HALELUYA NO. 107:1-2**

- |                                                                                                                                                                   |                                                                                                                                                                    |
|-------------------------------------------------------------------------------------------------------------------------------------------------------------------|--------------------------------------------------------------------------------------------------------------------------------------------------------------------|
| 1. Irikkon nasiam ma Au,<br>sonai nini Tuhanta.<br>Sai parnalang ma dirimu,<br>Hatang-Ku ma lah harga.<br>Sai mambur bahen lah ganup,<br>parlahoumin na so talup. | 2. Au do palihar dalanmin,<br>na dompak hagoluhan;<br>Ai seng be kahou langkahmin,<br>daoh pakon hamagouan.<br>Au parhiteian na bujur,<br>bai hasonangan na botul. |
|-------------------------------------------------------------------------------------------------------------------------------------------------------------------|--------------------------------------------------------------------------------------------------------------------------------------------------------------------|

PANGARAPAN SISADA-SADA IN

“Ise ma hanima, na mangasup paganjang ari-arini age saasta gelah marhitei na holsohan?”

Mateus 6:27

Bani piga-piga rumah sakit na modern boi do igantih jantung ni na boritan marhitei jantung na gogoh, na ibuat dokter humbani bangkei ni halak na baru matei. Ase lobih maju do ilmu kedokteran bani panorang on marimbang bani panorang ni Tuhan Yesus ijia. Tambahni ai rata-rata lobih panjang do umur ni jolma age i daerahta on bani panorang on, marimbang saratus tahun na salpu Halani panjagaon bani kesehatan, obat na modern pakon ilmu kedokteran na modern. Ase banggal do arti ni ilmu pengetahuan terhadap kesehatan. Anggo sonai, atap hurang sintong do hata ni Tuhan Yesus na i atas tanoh on, bani panorang na modern?

Sabalikni do, marhitei buei ni porang, terorisme, bom atom, pakon senjata modern na legan na adong, bencana alam, kecelakaan lalu lintas pakon humbani buei hal-hal na legan na so binotoh, na so boi do aman goluhta marhiteihon usaha-usaha ni hita jolma. Hapandeion pakon holsoh ni uhur pe lang sanggup laho paganjang umur. Anggo bois hasabaron ni Naibata atap anggo ipaturut Naibata mardalan domdom ni uhur pakon hajahaton ni jolma atap anggo domma itontuhon Naibata ujung ni goluh ni sada jolma, lang boi be marganjang umur ai. Halani ai sada do hansa na porlu ai ma tenger ni uhur pakon pangarapan bani Tuhanta, na boi mangurupi hita tarlobih bani panorang na modern on, ase ulang pala mabiar hita tongtong.

**Tonggo:** *Ham Tuhan Naibata, haotoon na banggal do ai, mangunsagahkon hamajuon atap hagogohon ni hanami jolma sandiri. Ulang paturut Ham hanami kahou, tapi ramotkon Ham ma hanami pakon dunia on, halani Ham tumang hansa na sanggup laho paluah hanami humbani hamagouan. Amen.*

HALELUYA NO. 240:1-2

- |                                                                                                                                                                                          |                                                                                                                                                                                             |
|------------------------------------------------------------------------------------------------------------------------------------------------------------------------------------------|---------------------------------------------------------------------------------------------------------------------------------------------------------------------------------------------|
| 1. Jahowa pangajamankin,<br>pangapoh bai uhurhu;<br>Na patorangkon dalankin,<br>sonang ibaen langkahku.<br>Sonang tongtong,<br>bai uhurhon,<br>ibahen Naibatanku,<br>Titah-Ni harosuhku. | 2. Ai hatundalan na botul<br>do Ham, o Naibatanku;<br>Ai Ham do na tongtong bujur<br>mambahen hagoluhanku;<br>Ham na gogoh,<br>sai saud do,<br>sininta- Mu, o Tuhan,<br>torsa do haganupan. |
|------------------------------------------------------------------------------------------------------------------------------------------------------------------------------------------|---------------------------------------------------------------------------------------------------------------------------------------------------------------------------------------------|



MANGINDAHI TUHAN

**“Ai sonon do hata ni Jahowa bani ginompar ni Israel: Pindahi Ahu, ase manggoluh hanima.”**

**Amos 5:4**

Aha do na porlu bani goluhta? Buei do balos, na ijalo hita humbani halak na legan. Ra buei do homa balos ni uhurta sandiri bani sungkun-sungkun on. Hamardekaon pakon hamajuon do na porlu, duit pakon arta, sipanganon, pakon siinumon, keamanan pakon keadaan na taratur, hasoman na madear pakon damei. Tontu boi ipaganjang hita buei balos sisonai ai bani sungkun- sungkun nongkan ai. Bani panorang ni Nabi Amos ijia ringgas do halak Israel, laho mamestahon pesta-pesta bani bagei-bagei ianan. Haganupan ai porlu do iahapkon ase boi manggoluh sidea. Icampur sidea do bani acara-acara hadaulaton ni sidea, ugama ni bangsa-bangsa simbalok pakon haporsayaon, pambalosi bani Naibata sisada-sada in.

Manurut pingkiran ni sidea, hurang lengkap ope ugama ni sidea ai, gepe iihutkon sidea hata ni Naibata. Hurang torang janah hurang lengkap iahapkon sidea hata ni Naibata. Tapi sadalan hubani pandapot ni Naibata sandiri, torang tumang do pambahenan-Ni pakon Hata-Ni, ase boi jumpah kuria-Ni in dalan hu Bani janah hubani hagoluhan in. Ai pandeinan sidea marimbang Naibata? Tontu lang. Ase pindahi hita ma Tuhanta janah pindo hita ma panonggor na torang hum Bani. Ase boi ibedahon hita na penting pakon na hurang penting sonai age na marbahaya bani goluhta. Ase dapot hita hagoluhan in humbani sumberni sandiri, artini humbani Tuhanta.

**Tonggo:** *Ham Tuhan Naibata! Marhiteihon hasabaron pakon holong ni atei-Mu talar do bannami Anak-Mu Jesus Kristus. Togu Ham ma hanami, ase ipindahi hanami Ham janah ipaima-ima hanami hagoluhan in hum Bamu, lang humbani parkuasa atap humbani jolma na legan atap humbani hagogohon pakon hapandeionnami sandiri! Amen.*

**HALELUYA NO. 127:1-2**

- |                                                                                                                                                                                           |                                                                                                                                                                                          |
|-------------------------------------------------------------------------------------------------------------------------------------------------------------------------------------------|------------------------------------------------------------------------------------------------------------------------------------------------------------------------------------------|
| 1. Jahowa Siparmahan au,<br>aha pe lang hurang ni.<br>Na sambor pe sai ipalao,<br>do humbai pinahan-Ni.<br>Tudu ibaen na lambut in,<br>Lao pagoluhkon tonduyhin,<br>ibaen holong atei-Ni. | 2. Itogu au bai na lihou,<br>bah tubuh hagoluhan.<br>Ibaen do tonduyhin siou,<br>bai dalan hasonangan.<br>Sonang do uhurhon tongtong,<br>sadokah au i tanoh on,<br>pasangapkon goran-Ni. |
|-------------------------------------------------------------------------------------------------------------------------------------------------------------------------------------------|------------------------------------------------------------------------------------------------------------------------------------------------------------------------------------------|

ISARIHON NAIBATA DO TONGTONG GOLUHTA

“Ulang ma mata duiton parlahou nasiam, hasonangkon nasiam ma na adong; Ai la sandiri na mangkatahon: Sabonar na so tadingkonon-Ku do ho, sabonar na so paturuton-Ku do ho!”

Heber 13:5

Bani panorang on buei do na lambin meningkat i negaranta, i kota age i huta-huta. Boi hatahononta bayak do jolma sonari marimbang paima merdeka hita. Ibagas na mardalan hamajuon-hamajuon in haganup, meningkat do homa panonggor ni hita jolma.

Ipagolpa bani ayat na iatas in: “Ulang ma mata duiton parlahou nasiam” Topat tumang do homa golpa-golpa on hubanta, halani buei hita na mata duiton bani panorang on. Gerger do mata mangidah duit, nini umpasa ni Simalungun. Sasintongni sedo mata ai na mubah gabe gerger, tapi parlahou ai do. Gabe ibuati jolma do lobih humbani parbagiananni, roh uhurni manangko, korupsi, mangoto-otoi hasoman pakon na legan. Dob ai jajet ma na hurang, itorihi ma dalan-dalan mansari duit, buei ma tongon jolma na sompong bayak, tarsonggot ma homa halak mangidah. Halani aha do ase mata duiton jolma?

1. Lang ihasonangkon na adong bani ai, maimpol tong mangidah na adong bani halak.
2. Lupa hita na adong banta ai ma na humbani Naibata.
3. Hurang martarimakasih bani ganup pasu-pasu ni Naibata.
4. Sihol jolma in mansarihon goluhni, gabe lupa bani bagah-bagah ni Naibata na mangkatahon: “Sabonar na so tadingkonon-Ku do ho, sabonar na so paturuton-Ku do ho!”

Patut do martarimakasih hita anjaha martenger ni uhur bani Tuhanta, ai isarihon do goluhta. Porini buei atap otik na adong bamu, sada panorang ipangindo Tuhanta do pertanggungjawabanta pasal ai. Halani ai pangkei ma hita mampargunahon na adong banta ase marsangap goran ni Tuhan. Nini bani Mateus 6:33. “Parlobei ma pindahi hanima Harajaon ni Naibata ampa hapintoranni, dob ai tambahkonon-Ni do ganupan ai bannima.”

**Tonggo:** *Ham Jesus Tuhannami, urupi Ham ma hanami. Ai gati do hanami tartolsu ibahen habayakon na i dunia on. Moru homa holongnami bani hasomannami sonai tenger ni uhur hu Bamu. Ajari Ham hanami marhitei Tonduy-Mu, ase martenger ni uhur Bamu hanami bani goluh on. Amen.*

HALELUYA NO. 6:8+15

8. Naibata, Ham do bayak,  
sibere hanai on;  
Ai Ham do na tongtong layak,  
manumpak jolma on.

15. Paturut Naibata gelah  
patorsa langkahmin;  
Ase tongtong sonang ho lah,  
timbul ‘pa tuahmin.

ULANG MABIAR!

“Tapi nini ma dompak sidea: Ahu do on, ulang hanima mabiar.”

Johannes 6:20

Malas tumang uhur ni simbuei pakon susian ni Tuhan Jesus dob bosur mangan sidea na 5.000 halak ai, marhitei tanda halongangan na binahenni Jesus. Dob ai misir bei ma sidea. Sanggah na marparau susian ai, roh ma logou na doras pakon gilumbang na banggal mandorab parau ni sidea, sosak anjaha mabiar tumang do susian ai. Igogohi sidea do manlugai gendo das namin hu labuhan ase ulang marbahaya sidea i tongah-tongah ni tao ai. Sompong, taridah ma Jesus mardalan i atas tao ai manjumpahkon parau ni sidea, tapi lambin mabiar do sidea, nini uhurni homa, begu do na roh ai. Jadi nini Jesus hubani sidea: Ahu do on, ulang hanima mabiar.

Sonai do akibat ni uhur biar bani jolma, ra do gabe lepak panandaion bani Tuhan in. Age bani panorang on, buei tumang do logou na doras pakon gilumbang na banggal na tongtong mandorab goluhta i dunia on. Umpamani: Sitaronon, hasunsahan, naborit, hamarsikon sonai age pangangguran ni niombah, perampokan, pembajakan, perkosaan, parsalisihan, pamunuhan, porang pakon na legan. Ganupan in hotop manosak goluhta. Gati homa iparpala-palai hita jongjong do Tuhan Jesus i lambungta laho mangurupi hita. Tapi halani golap ni hauhuronta, gabe lepak panandaionta bani Tuhanta, iagan hita homa atap begu ni aha deba na roh.

Ahu do on, nini Tuhan Jesus hubanta age sadari on. Anggo Tuhanta do hasomanta, seng dong habiaranta i dunia on. Ai nini do bani Mateus 28:20: Tonggor ma, sai hasomanan-Ku do hanima ganup ari, ronsi roh ujung ni dunia on.

**Tonggo:** *Ham Jesus Tuhannami, pargogoh na so tarimbang. Jolma na galek do hanami, hotop mabiar hanami mandompakkon gilumbang na mandorab goluhnami. Ungkap Ham ma mata ni haporsayaonnami ase tangkas itandai hanami Ham pakon panghopkopon-Mu. Sai gok Bamu ma tongtong goluhnami arian pakon borngin. Amen.*

HALELUYA NO. 311:3-4

3 Ham pangajaman,  
bani goluhkon,  
bai parlajouan,  
Ham hujolom tong.  
Seng jumpah ahu,  
songon Ham Tuhan,  
arian borngin  
rap au pakon Ham.

4. Seng au mabiar,  
ai dohor Bamu,  
parngit pe goluh,  
lang borat be in.  
'Ge hamateian,  
lang marsorod be,  
Tuhanku na dob  
puho rapkon au.

IJALO JESUS DO GANUP NA ROH HUBANI

**“Haganup na binere ni Bapa in Bangku, in do na roh Bangku, anjaha seng anjai pabalion-Ku na roh hu Bangku.”**

**Johannes 6:37**

Podas do tarkabar barita pasal tonda halongangan na binahen ni Tuhan Jesus, ai ma na ibere mangan 5000 halak. Gabe marrohan dojolma laho mangindahi-Si. Deba ma ai sihol mangindahi tanda halongangan deba tagih bani roti na mantin. Na legan roh ibagas pangarapan paboa Jesus laho pajongjongkon sada organisasi sosial na baru. Ase tarjamin sipanganon ni sidea age lang marhorja. Memang halani gati masa hasunsahan gabe hotopan soal-soal pardagingon do ipingkiri sidea. Tapi ipatorang Tuhan Jesus do tujuan ni parroh-Ni hu dunia on, sedo pitah mambere sipanganon tapi paluahkonjolma humbani dousani do.

Diatei tupa do hatahononta hubani Bapa na i Nagori Atas ai, halani isuruh do Anak haholongan-Ni roh hu dunia on. Marhitei ayat na i atas in tangkas do iarusi hita, paboa ham age ahu, domma iondoshon Bapa na i Nagori Atas ai hubani Tuhan Jesus ase Ia paluahkon hita. Ase, idop ni uhur ni Naibata do hubanta na isuruh Anak-Ni gabejolma. Seng pala mabiar hita. Tapi gati do hita marsidalian roh hubani Jesus, tarlobih bani panorang Horja Banggal Napansing. “Nasiam ma lobei, nasiam na so mardousa in, parpudi ma au, lang talup ope au, banggal tumang dousangku, sanggah manggila do nuan Tuhan bangku,” sonai do hotop iluarhon hita.

Age sonaha banggal ni dousanta, asal ma ra hita roh hubani Tuhan Jesus, ijalo do hita. Seng onga itulak Tuhan in na roh hu Bani. Ulang dousanta, hahuranganta ai gabe ambat-ambat banta laho roh hubani Tuhan Jesus.

**Tonggo:** *Ham Jesus Kristus Tuhannami. Ididah Ham do aha na manggoki uhurnami marsada-sada. Buei do na manundati hanami roh hu Bamu, marhitei bagei-bagei ni na masa na manrahut uhurnami i dunia on. Roh do hanami hu Bamu marhitei uhur na gok dousa. Papansing Ham hanami marhitei daroh-Mu. Tarima kasih ma Bamu Tuhan. Amen.*

**HALELUYA NO. 147:3+6**

3 On pe Bamu  
naman au roh,  
sai ulang tulak ahu;  
Pahombun Ham,  
o Naibata,  
parringis-Mu hubangku.

6. Padaoh Ham  
na jahat in,  
papansing Ham uhurhu.  
Sihol unduk  
do au Bamu,  
sai Hata-Mu do bangku.

HAPUTUSAN MANGIRIKKON JAHOWA

“Dob ai nini bangsa ai ma mambalosi: Daoh ma ai humbannami, anggo mintor tadingkononnnami Jahowa, laho mambalosi naibata na legan.”

Josua 24:16

Domma martahun-tahun si Josua mambobahon bangsa Israel, hun Tanoh Mesir das hu Tanoh Kanaan. Matua ma homa angkulani, ibotoh do na laho salpu ma panorangni i dunia on. Iddidah homa sonaha cara marpingkir ni Bangsa Israel ai. Pitah sanggah dear do goluh ni sidea, sanggah monang hun parporangan atap maluah humbani parmaraan, ijai do sidea mandoding janah manortor patuduhkon malas ni uhur bani pangurupi ni Naibata.

Anggo dong panorang na parngit, lohei, hasunsahan, mintor podas do bangsa ai manundalhon Naibata. Ipauli sidea naibata gana-ganaan bahen sisombahon ni sidea. On ma na ihabiari si Josua, ase ibahen rapat bolon patumpuhon pangituai-pangituai ni bangsa pakon bangsa ai, laho mambahen sada haputusan na tontu. Ai ma, mamilih Naibata Jahowa atap naibata na legan; sukarela lang paksaan.

Sadar do bangsa ai bani panlanggaronni pakon bani dear ni panogu-nogu ni Naibata bani sidea. Saud ma adong haputusan pakon pangakuan ni bangsa ai, nini: Seng anjai tadingkononnnami Naibata Jahowa ibagas goluhnami. Hita pe kuria bani panorang on, bapa, inang, namaposo, porlu do ganup panorang mambahen haputusan atap ise siihutkononta ibagas goluhta on. Ibotoh hita, pardear layak do Jahowa. Tapi mase buei halak Kristen na mulak hubani hasaparion mangkaporsayai datu, sisombah-sombahon, nasib pakon legan? Buei homa na gabe Kristen goran, Kristen pandidion, Kristen Natal. Atap Kristen pitah bani malas ni uhur. Dong homa satongah ni uurni bani Naibata, satongah nari ipakei bani horja hagolapan. Gati hita mardua Tuhan ibagas goluhta. Seng sonai na pinangindo ni Tuhanta, tapi pambalosion na gok janah na so mubah-ubah do. Seng dong sisombahon na legan sobali la. Songon pangakuan ni si Josua ai ma age pangakuanta: “Tapi anggo ahu pakon hasomanku sarumah, Jahowa do sibalosannami.” (Josua 24:15)

**Tonggo:** *Ham Jahowa, patotap Ham ma uurnami mangkaporsayai Ham ibagas goluhnami. Buei do tongon panlanggaronnnami. Gati do hanami marnaibata na legan ibagas goluhnami, marhitei na martenger ni uhur hubani hagogohon na adong i dunia on. Marpadan do hanami seng anjai tadingkononnnami Ham, ai Ham do Naibata na manggoluh na patut balosannami. Sai gok Bamu ma daging ampa tonduynami. Amen.*

HALELUYA NO. 249:1

1. Seng tadingkononku Ham,  
ale Jesus Sipagoluh.  
Sai irikkononku Ham,  
sadokahni au manggoluh.  
Ham do hagoluhankin,  
seng tadingkononku in.

MARMALAS NI UHUR MA

“Mambogei ai marmalas ni uhur ma parbegu anjaha ipuji sidea ma Hata ni Tuhan in, gabe porsaya ma na dob tinontuhon hinan hu hagoluhan sisadokah ni dokahni.”

Lahoan ni Apostel 13:48

Sada malas ni uhur do ai anggo boi ope hita mambogei Hata ni Naibata bani goluhta on. Halani dong do holi panorang seng tarbahen hita mambogei Hata ni Naibata, age sihol uhurta.

Sonai ma na tarjadi bani panorang Apostel Paulus pakon si Barnabas marambilan, buei do halak na roh. Deba ma ai halani Jahudi pakon halak na roh humbani sipajuh begu-begu. Anggo halak Jahudi irehei janah marsimburu do hubani Apostel ai age hubani Hata ni Naibata; hape anggo bani parbegu begu ambilan malas ni uhur do ai.

Tontu roh sungkun-sungkun: Mase malas uhur ni parbegu, janah iusir halak Jahudi Apostel hun huta ai? Halani iambilankon Apostel ai pasal hasasapan ni dousa ronsi haluahon marhitei panghopkopon ni Tuhan Jesus. Ninuhur Jahudi: Sungkup ma marhitei aturan na binahen ni si Musa dalan hu haluahon.

Sonai ma gati hita on, gabe songon halak Jahudi na mamorluhon aturan, age pe lang marhaporsayaon bani Jesus na sirsir matei laho manghopkop hita. Hape na lobih porlu ai ma marhaporsayaon bani Jesus janah mangkorjahon hata-Ni domu hubani na dob niaturhon-Ni. Atap hata na legan: Marhorja ma hita domu hubani na dob niaturhon ni Jesus Kristus. Ai horja na taratur ai do deba na hinarosuhkon-Ni.

Sonaha nani, domma malas uhurta halani Tuhanta? Atap malas uhur halani jenges horjanta, boi idalankon hita aturan pakon na legan? Anggo sonai do mambahen malas uhurta tontu lang honsi dear horjanta, pusok ma uhurta. Horja mando na pamalas uhur sedo Tuhan be.

Marhitei ambilan on ipatugah hubanta ase Tuhanta ma na gabe malas ni uhurta, age marhorja hita ronsi na mambogei hata-Ni. Age ibagas na jenges horja, keadaanta ningon Tuhanta do sipuji-pujionta. Ai la do na boi mambahen malas uhurta bani goluh on. Jesus do na boi manasap dousanta ronsi pasirsirhon hagoluhan banta.

**Tonggo:** *Ham Tuhan Naibata Bapanami, Ham do na boi mambere malas ni uhur bennami. Ham do homa na manasap dousanami ronsi mambere hagoluhan bennami. Tarimakasih ma Bamu, ai Ham do na mambahen dihut hanami parsimada bani hagoluhan sisadokah ni dokahni. Amen.*

HALELUYA NO. 132:2+4

2. Tarima kasih ma  
Bamu, o Naibata  
parlayak Ham!  
Sibahen dalan in  
marhitei Jesus in  
hu Surga in.

4. Isuruh Anak-Mu  
hubangku Tonduy-Mu  
na hum Bamu,  
manogu tonduyhin  
hu hasonangan in,  
na puji Ham.



HAROSUH NI NAIBATA

“On do harosuh ni Naibata, ase pansing ma nasiam, ase daoh ma nasiam humbani panriah-riahon.”

1 Tessalonika 4:3

Podah ai ma hata na marpardomuan bani ganup tingkah laku. Sedo pitah hata na luar na sinobut podah, tapi dihut do bani na mangkorjahon isi ni podah ai. Sonai do Jesus mamodahi ganup susian-Ni. Artini ganup na pinodahkon-Ni ai ma ganup na ihorjahon Jesus. Ase anggo Jesus mamodahi, boi ididah susian-Ni isi ni podah ai marhitei goluh-Ni sandiri.

Ijon ipatugah, ipodahkon Jesus pasal harosuh ni Naibata. Ai ma ase pansing hita. Ai do homa na ipatugah Apostel Paulus hubanta. Sedo mintor luar hata on. Tapi parlobei ipatugah do sonaha na patut bani goluh on. I lobei ni teks on isobut ope sonon: ipangindo anjaha ipodahi hanami ma nasiam. Tontu hapansingonta ai ma halani Jesus. Sedo anggo halani usahanta. Halani anggo hita gok dousa do haganup. Ase boi hita pansing ningon do homa ihagoluhkon hita hapansingon na humbani Naibata.

Mangkagoluhkon hapansingon sedo na mararti ai itadingkon hita dunia on. Gabe hatahononta ma use: Seng tarbahen pansing i dunia on, i surga pe holi hapansingon na isobut ijon ai ma: age i dunia on ope hita totap ma hita manggoluh ibagas harosuh ni Naibata, lang ibagas harosuh ni dunia on. Halani harosuh dunia on ai ma horja ibagas hagolapan.

Halani ija marianan harosuh ni Naibata ijai ma homa jumpah hita hapansingon ai, janah daoh ma harosuh ni dunia on. Domma ipatugah Naibata hubanta pasal harosuh ni uhur-Ni. Naha sirsir do hita manggoluh ibagas harosuh ni Naibata sonari, atap sonaha pe situasi ni goluhta? Atap marpanorang do hita manjalo panghopkop ni Tuhan Jesus, sirsir homa hita mandalankon harosuh ni Naibata; ijai do lambin itandai hita idop ni uhur-Ni.

**Tonggo:** *Ham Naibata nami, urupi Ham ma hanami ase tongtong hanami manggoluh ibagas harosuh ni uhur-Mu bani haganup keadaan ni goluh nami. Ase lambin tarhamalashon hanami goluh panorang on. Amen.*

HALELUYA NO. 148:2+4

2 Pardousa na banggal do au,  
pansing do anggo Ham;  
Sai bai na dorsa laho au  
bai na jahat naman.

4. O, Jesus sai tangihon on,  
padaoh Ham jahatkin;  
Pansing ma baen Ham uhurhon,  
ase sai sonang in.

DAMEI NI KRISTUS

**"Anjaha damei ni Kristus ma manrajai ibagas uhur nasiam, ai hujin do nasiam tardilo gabe sada angkula. Gabe sipartarima kasih ma nasiam."**

**Kolosse 3:15**

Nini sada halak: Sonai buei ni jolma sonai do homa buei ni uhurni. Tontu adong do hasintongan ni pandapot sisonon. Porini bani halak na marsanina i kuria age das hubani masyarakat pe hotop taridah piga-piga pandapot bani sada pahara. Age pe namin dobni terlaksana do rencana ai, tapi domma ipungkah marhitei na bagei do pandapot pasal pahara ai.

Hasadaon ni pingkiran, uhur ningon do parlobei damei ni Kristus manrajai uhurta. Baru pe boi terlaksana rencana na dob isahapkon hita. Halani sadokah lang damei ni Kristus manrajai uhurta, domma lang tarsuhuni hita pangindoanni uhurta. Ai haganup dunia on sihol do banta ai ma anggo uhur i sungkun hita. Hape anggo lang dong tarrajai uhur marhitei damei ni Kristus, tontu gabe uhur-uhurta mando banta, gati lang tarjalo hasoman age hita. Sonai homa sebalikni, hasoman hubanta.

Marhitei sisada uhur do boi hita isobut sisada angkula. Halani songon sada angkula marhorja marhitei na iatur ni sada uhur na humbagas angkula, sonai ma hita anggo domma marianan damei ni Kristus bani hita marsada sada tontu domma gabe sada hita, sada ibagas harosuh ni Tuhanta.

Hadameion ai roh humbani Naibata marhitei panghopkop ni Jesus Kristus. Ai ma idop ní uhur-Ni hubanta. Halani ai do homa ase iojur Apostel Paulus hita tongtong manggoluh na martarimakasih. Pataridahkon hita ma ai marhitei ganup aktivitas ni goluhta, ase songon na sinobut ni Apostel Paulus: Sedo ahu na manggoluh in nuan, tapi domma Kristus manggoluh ibagas ahu.

Sonaha do nani hita on. Domma damei ni Kristus na manrajai hita? Atap domma gabe sisada angkula hita on? Marhitei na sirsir do hita mandalankon harosuh ni Tuhan mambahen marianan damei ni Kristus ibagas hita. Ase roh ma hita hubani Tuhan ibagas goluh na martarimakasih, ai idop do uhur-Ni mangidah hita.

**Tonggo:** *Ham Tuhan Jesus, urupi Ham na hanami ase tongtong sada hanami marhitei damei-Mu marianan ibagas uhurnami marsada-sada. Ase ibotoh hanami manggoluh na martarimakasih hunjon hujanan. Amen.*

**HALELUYA NO. 497:1+2**

- |                                                                                                                                                                                                                                   |                                                                                                                                                                                                                                                   |
|-----------------------------------------------------------------------------------------------------------------------------------------------------------------------------------------------------------------------------------|---------------------------------------------------------------------------------------------------------------------------------------------------------------------------------------------------------------------------------------------------|
| 1. Holong ni Jesus<br>manggomgom ganup Kuria,<br>na patotapkon hasadaonta in.<br>Damei-Ni in ma manrahut paruhuranta.<br>idop uhur-Ni batar-batarta in.<br>Damei-Ni in ma manrahut paruhuranta.<br>idop uhur-Ni batar-batarta in. | 2. Riap ma hita sauhur<br>martangkap tangan,<br>ibagas damei na humbai Tuhan in.<br>Marpangarapan tongtong bai horja ni Tuhan<br>hataridahan ni hasintongan-Nin.<br>Marpangarapan tongtong bai horja ni Tuhan,<br>hataridahan ni hasintongan-Nin. |
|-----------------------------------------------------------------------------------------------------------------------------------------------------------------------------------------------------------------------------------|---------------------------------------------------------------------------------------------------------------------------------------------------------------------------------------------------------------------------------------------------|

TAHAN BANI PARLAJOUAN

**“Martuah ma halak na tahan bani parlanjouan, ai dob monang bani parlanjouan ai, jaloonne ma sortali hagoluhan, na dob pinarbagah ni Naibata bani na marholong ni uhur Bani.”**

**Jakobus 1:12**

Urah tumang luar sahap humbanta panorang on anggo ibagas hasunsahan atap pusok ni uhut hita: “Parlanjouan humbani Tuhan ma on.” Hape ra do ai halani ibalosi hita hisap-hisap ni dagingta atap halani lang manggoluh ibagas harosuh ni Tuhan hita. Atap hata na legan: Sibolis do na manlajou hita, atap na sintong do ibalosi hita Tuhanta. Ai nini Jakobus 1: 13: “Ulang ma adong na mangkatahon, sanggah na tarlajou ia: na tarlajou do ahu humbani Naibata.”

Memang ra do roh sungkun-sungkun humbagas uhurta sonon: Mase ma ihatahon Apostel Jakobus tahan bani parlanjouan, anggo seng dong parlanjouan na bani pasal parlanjouan na imaksudhon ni si Jakobus ijon. Halani dua masam do na tongtong mangiankon hadirionta ai malas ni uhur atap pusok ni uhur. Lang onga rap dapot bani sada panorang on ibagas hadirion ni sada-sada halak. Tapi na margantih-gantih do on.

Halani na ijahani pe ai sonari bani hadirionta boi ai padaohkon hita atap dalanta laho manundalhon Naibata. Tapi boi do dalan laho parapatkon hadirionta hubani Naibata. Gabe boi do ai parlanjouan banta. Tergantung hubani pamakeita do ai. Naha boi dope na masa ai ipakei hita manandai holong ni atei ni Tuhanta hubanta? Nini Pangungkabon ai: Sai bujur ma ho ronsi matei, dob ai berehonon-Ku ma hubam sortali hagoluhan in.

Ase habujuron mamakei haganup ibagas harosuh ni Naibata, mambahen na ibotoh hita na dob monang hita. Habujuron na marisi haporsayaon bahasa haganupan in ai ma idop ni uhur ni Tuhan, sedo marhitei gogohta sandiri. Termasuk hamonanganta ai, ai ma idop ni uhur ni Tuhanta hubanta, marhitei panghopkopon ni Tuhanta Jesus Kristus. Ia do na pasirsirhon ronsi na mambagahkon ai hubanta. Ase pakei hita idop ni uhur Tuhanta laho manjalo hamonangan ronsi sortali hagoluhan. Kawahkon hita ma sitaronon ni Jesus na dob manaluhon sitarononta.

**Tonggo:** *Tuhan, sai pargogohi Ham ma ahu bani goluhku. Pitah pangurupion-Mu mambahen hutandai holong ni atei-Mu na banggal in, ase ulang madabuh ahu, tapi ase monang ma ahu halani pangkasomanion-Mu bani goluhku, na gabe hasangapon-Mu ma in janah na parapatkon hadirionhu hu Bamu. Amen.*

**HALELUYA NO. 392:1+4**

- |                                                                                                                                                                             |                                                                                                                                                                           |
|-----------------------------------------------------------------------------------------------------------------------------------------------------------------------------|---------------------------------------------------------------------------------------------------------------------------------------------------------------------------|
| 1. Na mardalan do ganupan<br>na porsaya in.<br>Lao marayak hasusuran,<br>in ma surga in. Jesus,<br>Jesus, sai bobahon ma,<br>ulang sonto bai horbangan,<br>ge sompit pe in. | 4. Malas uhur ni na monang<br>na tahan ijin.<br>Ai dapotsi hagoluhan<br>sadokah ni in.<br>Jesus, Jesus, sai bobahon ma,<br>ulang sonto bai horbangan,<br>ge sompit pe in. |
|-----------------------------------------------------------------------------------------------------------------------------------------------------------------------------|---------------------------------------------------------------------------------------------------------------------------------------------------------------------------|

HAPORSAYAON IBAGAS JESUS KRISTUS

“Lajou nasiam ma diri nasiam, atap na ibagas haporsayaon do nasiam, pareksa nasima ma diri nasiam. Ai na so ibotoh nasian do bani diri nasiam, paboa na ibagas nasiam do Jesus Kristus? Anggo lang, na so talup ma nasiam.”

2 Korint 13:5

Lang ganup jolma sirsir manlajou dirini. Tapi anggo na hundarat manlajou dirini mintor ra ma berontak ia, atap gabe roh sungkun-sungkun sandiri: Mase sonon ahu. Padahal manlajou diri sandiri sada hal na maharga do ai. Halani marhiteihon ni ai do hita manandai dirinta i lobei ni hasoman tarlobih i lobei ni Tuhanta. Memang manandai diri, on ma horja na mahol. Halani sadokah lape na tandai diri, sipata ra do tarbador diri; janah sadokah ai do homa hurang giat hita mangkorjahon horjanta, ronsi lang sintong parsauranta. Lobih ni ai ope lang tarhamalashon hita keadaanta.

On ma homa na ipagolpa Apostel Paulus hubani Kuria Korintus, ase itandai dirini sandiri. Halani marhitei na so manandai diri do mungkahni tarjadi pamihak-mihakon i kuria ai. Dong hampit Paulus, Kepas, Apollos. Hape haganupan hita on ai ma hampit Jesus. Ai Jesus do na padashon ronsi na paluahkon hita. Domu hujon ma namin hita manggoluh, artini manggoluh ibagas haporsayaon ibagas Jesus Kristus.

Sonai ma homa hita halak Kristen, na mangirikkon Jesus. Porsaya do hita bahasa ganup goluhta iramotkon Jesus. Naha nani sintong do ihagoluhkon hita pangakuanta ai? Pasal on ma sihol pareksaonta dirinta marhitei ambilan on, ase halak na talup hita. Talup bani panluar, talup bani parlahou.

Halani marhitei na ilajou ronsi ipareksa hita dirinta boi lambin itandai hita ase na tongon hita. Bahasa aha pe lang tarbahen hita anggo lang Tuhan mambere gogoh ronsi mamasu-masu horjanta. Lang boi sonang ronsi marmalas ni uhur hita anggo lang halani Tuhan manlayak-layakkon ai hubanta. Ase marhitei na manandai diri roh ma hita hubani Tuhanta, ase lambin ihaporsayai hita paboa Tuhan Jesus do na marianan i tongah-tongahta.

**Tonggo:** *Ham Bapanami, urupi Ham ma hanami manandai dirinami. Ase lambin ihaporsayai hanami paboa Ham do na manramotkon ronsi na paluahkon hanami, gabe halak na talup hanami i lobei-Mu age i lobei ni hasoman jolma. Amen.*

HALELUYA NO. 124:1+5

1. O Tuhan, pareksa Ham au sondangi uhurhu tangkas.  
Ai seng dong margogoh be au!  
∴: Bamu au paringgas,  
Bamu au padonok,  
Bamu mando au.

5. Ipuji uhurhu do tong  
Ham Jesus, hasomanku tong;  
Gogohku Ham mando tongon.  
∴: Sai gok ma uhurhu,  
mamuji goran-Mu,  
hupuji bujur.

PADANTA

**“Dob ai ibuat ma Pustaha Parpadanan ai, ibasahon ma ai i lobeini bangsa ai, jadi nini sidea ma: Ganup na hinatahon ni Jahowa, sai na bahenonnam i anjaha tangihononnam do.”**

**2 Musa 24:7**

Bangsa Israel ipimpin si Musa luar humbani parjabolonan i Tanoh Masir. Buei do halongangan na ibahen Naibata i Tanoh Masir, ase maluah Bangsa Israel humbani gomgomanni Raja Farao. Itogu-togu do sidea manlopusi tanoh halimisan ronsi na mandipar Laut Sigerger. Lang adong be na hurang na ibahen ni Naibata dompak sidea.

Nabi Musa rup pakon pambobai-pambobai ni Bangsa Israel: Aron, Abihu, Nadab ampa sipitu puluh halak pangintuai ni Israel, mangarahkon bangsa ai mambahen parpadanan. Nabi Musa mambuat Pustaha Parpadanan, ase marpadan bangsa ai i lobei ni Naibata, ase ulang marnaibata na legan sidea songon sipajuh begu-begu. Ase ulang taruyun sidea hu bani hasomalan ni sipajuh begu-begu. Ase bangsa ai mambahen “Kebulatan Tekad” i lobeini Naibata.

Halak Kristen pe gati do marjanji sanggah kebaktian i Gereja. Umpamani sanggah panorang pandidion niombah, sanggah upacara perkawinan, sanggah Horja Banggal Napansing ronsi das hubani sanggah manjalo tohonan atap pe acara pelantikan i Gereja. Gati do na idah, lang adong uhur biar bani jolma in laho marpadan i lobeini Naibata sanggah kebaktian i Gereja. Hapeni panorang marpadan ai ibahen sanggah panorang kebaktian i Gereja, mase bahat jolma in mangosei bani Padan (ingkar janji) i lobeini Naibata. Age pe tongon lang taridah Naibata secara langsung bani kebaktian ai, lang songon si Musa na boi langsung pajumpah pakon Naibata i Dolok Sinai, tapi ihaporsayai hita do bahasa Naibata hadir do ibagas Tonduy.

Haru marpadan dompak hasoman jolma maningon do sintong ibalosi selaku halak na dob dewasa, samintolah na marpadan pakon Naibata. Maningon biaran do hita marpadan i lobeini Naibata ase i lobeini haganup jolma i dunia on. Ulang mangosei padan i lobeini Naibata, age pe la lang boi iidah hita secara langsung. Naibata lang onga lupa bani padan-Ni, ibalosi do padan-Ni hubani si Abraham ronsi hubani ginomparni ibagas panorang marribu-ribu tahun. Bangsa ni Naibata totap do mardingat anjaha mambalosi padanni i lobeini Naibata Jahowa age pe na na masa i dunia on.

**Tonggo:** *Tuhan ajari Ham ma hanami mambalosi hata-Mu ibagas gokni uhur pakon pingkirannami, domu hubani padannami i lobei-Mu. Amen.*

**HALELUYA NO. 448:1-2**

- |                                                                                                                                                                                                                                                                                                                                                                                      |                                                                                                                                                                                                                                                                                                                                                                                    |
|--------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------|------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------|
| <p>1. Mantin ni in do hape, padanni Tuhan Jesus,<br/>pamalas uhur tene, bai ganup na tinobus.<br/>Dear tumang padan-Nin, na gabe sijoloman,<br/>patoguh uhur do in, bai na marpangarapan.<br/>Sai hagoluhkon ma in baen rudang hajengeson,<br/>ase sonang ham ijin gok Tonduy hasintongan.<br/>Hinalayak-Ni do in pasirsir haluahon,<br/>janah damei uhurmin jumpahan hagoluhan.</p> | <p>2. Sai jalo ham Tuhan in, na gabe Siparmahan,<br/>baen hatengeran do in ronsi na ondos padan.<br/>Seng habiaran be in pori aha na masa,<br/>ai seng ijin ujungniin goluh ni na porsaya<br/>Sai hagoluhkon ma in baen rudang hajengeson<br/>ase sonang ham ijin gok Tonduy hasintongan<br/>Hinalayak-Ni do in pasirsir haluahon,<br/>janah damei uhurmin jumpahan hagoluhan.</p> |
|--------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------|------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------|

ULANG SURUT HARINGGASON

“Ulang ma surut ringgas ni uhur nasiam, hinsah ma ibagas tonduy, sirsir ma mambalosi Tuhan in!”

Rom 12:11

Ipalumba Apostel Paulus do kuria na i Rom ase ganup mamareksai uhurni. Ise ma na surut ringgas ni uhurni, hinsah ni tonduy, sirsir ni uhurni mambalosi Tuhan in pakon na legan. Anggo surut sondang ni suluh roh ma na golap mangisi. Ase maningon tongtong do pondang suluhta, marsinalsal ibagas na golap. Iarahkon Apostel ai do na tolu bagian ni hauhuron ai, hinsah, ringgas pakon sirsir, hubani sada tujuan na maharga tumang do boi mamboban hu hagoluan sonari pakon magira, ai ma laho mambalosi Tuhan in.

Dalan hu haliaron ni hauhuron ai ma mambalosi Tuhan in. Halani Tuhan do sumber ni haringgason pakon hasirsiron marhasoman bagah-bagah hubani halak na ra mangkorjahon. Dingatonta do bagah-bagah ni Tuhan in: Anggo parroh-Ku bani nasiam ai ma ase bayak nasiam bani haganup. Boi ma iarusi hita ise-ise ma halakni na ringgas bani lahoanni, hinsah tonduy, sirsir loja pakon na legan janah halak na sonai bahat do jaloanni pasu-pasu humbani Naibata. Isuruh Raja Salomo do halak na marayoh ase marguru bani porkis.

Ibere Naibata do banta panorang laho marhorja, janah ipasu-pasu ase manjadi horjanta. Buei do halak na mangkatahon hurang horjani. Lang marosuh Naibata mangidah halak na sohsoh. Naibata sandiri das bani sonari tongtong do marhorja. Bangsa ni Naibata pe bangsa siparhorja do ai. Tapi dong do homa na papeletkon arti ni horja on. Horja ai do ibahen use mangambatsi laho mambalosi Tuhan in, sampai dong use na marnaibatahon horjani. Ai ma na surut haringgason mambalosi Tuhan in dobni magou ma ia pakon arta ni ai. Ase balosi hita ma Tuhan in humbani ringgas, hinsah pakon sirsir ni uhurta.

**Tonggo:** *Ham Bapanami, pakon Ham Tuhan Jesus ampa Ham Tonduy Napansing! Pargogohi Ham ma hanami ase ulang moru holong ni uhurnami songon holong mula-mula na itandai hanami Ham, tapi tambah maringgas, hinsah pakon hasirsironnami mambalosi Ham. Amen.*

HALELUYA NO. 466:1-2

1. Ringgas hita marhorja,  
ase torsa marhasonangan  
goluhta on.  
Sirsir do tong Tuhanta,  
mambere gogoh lao marhorja  
hubanta on.  
,:Naima da tongon,  
amen sai saud ma sonin.

2 Horjahon ma rosuh-Ni,  
ase dapotan pasu-pasu  
horjamu in.  
Manggargar na sinari,  
janah tongtong  
ihasomani Tuhanta in.  
,:Naima da tongon,  
amen sai saud ma sonin



TITAH HOLONG NI ATEI

**“Ia tujuan ni Titah in, in ma holong na roh humbani uhur na borsih ampa panggora ni uhur na madear ampa haporsayaon na pitah.”**

**1 Timoteus 1:5**

Paima ibere Naibata Titah bani halak Israel, parlobei ipaluah do sidea humbani panjajahan Masir. Naibata sandiri do hansa na boi paluahkon sidea humbani panjajah na gogoh in. Dob maluah sidea, ai pe ase ibere Naibata Titah bani halak Israel.

Sada syarat laho marsaor pakon Naibata na mapansing ai, ai ma hapansingon ni hauhuron, na roh humbani uhur na borsih. Syarat na paduahon, maningon tubuh panggora ni uhur na madear bani ganup na dob ipaluah. Dob sonai baru pe boi tubuh haporsayaon na pitah dompak Naibata.

Si Timoteus ai ma haondosan ni surat ni Apostel Paulus on. Gabe golpa-golpa do on hubani sandiri ase ijaga hapansingon ni ambilan na madear na sihol ambilankononni. Hita sandiri pe domma ijalo hita bei Titah na humbani Naibata. Ia isi ni Titah in na parlobei ai ma: Mangkaholongi Naibata, dob ai pakon ujung ni Titah in. Ia sandiri Jesus Kristus do manggoki isi Titah ni pakon ujung ni Titah in. Ia sandiri mambere hubanta Titah na baru, nini do: Titah na baru Hubere bannima, ai ma ase marsihaholongan hanima samah hanima. Songon holong ni uhur-Hu bannima, sonai ma hanima marsihaholongan. (Johannes 13:34)

Dong do na so borsih panggora ni uhurni, halani uhurni pe lang borsih. Aha do na boi paborsih hauhuron? Nini Tuhan Jesus: Domma borsih hanima halani Hata in na Huhatahon bannima. Tapi sonai pe hotop do ipamatei hita panggora ni uhurta na borsih ai, lang saud ihorjahon hita. Hape namin anggo ihorjahon hita panggora ni uhur na borsih ai, mangurupi ma ai ase dapot haporsayaon na pitah. Janah haporsayaon na pitah ai totap do marhasoman horja.

**Tonggo:** *Ham Bapanami, urupi Ham ma hanami manangar pakon marimbagashon ampa mangkorjahon hata-Mu. Amen.*

**HALELUYA NO. 207:2-3**

2. Sai ajari Ham hanami,  
na tongtong ibagas haotoon in.  
Sai porsaya ma hanami,  
Ham tumang do hagoluhannami in.  
Roh dokahni, roh dohorni,  
Uhur-Mu bai uhurnami,  
Sai sadalan pakon Hata-Mu hanami.

3. Sai martuah ganup hita,  
na mambahen Jesus arihanni in.  
Ambit sai tongtong ra hita  
martenger ni uhur bai Tuhanta in.  
Ham, o Jesus, sai patoguh  
hanai na i parporangan.  
Ase jumpah bai ujungni hamonangan.

MARGOGOHO IBAGAS TUHAN

“Ambahni ai, lambin margogoh ma nasiam ibagas Tuhan in ampa ibagas gogoh ni kuasa-Ni in.”

Epesus 6:10

Na ipindohon Apostel Paulus do Kuria Epesus ase margogoh ibagas Tuhan in, ampa ibagas kuasa-Ni. Aha do halani ase ipindohon sidea maningon margogoh ibagas Tuhan in? Halani on do: Dong do munsuh na gogoh tumang na so tartaluhon marhitei gogohni sandiri. Ai ma siparkuasa na i awang-awang sigomgom dunia hagolapan, tonduy hajahaton na so tarimbang marhitei gogoh ni parangkulaon atap sinjata na humbani habotohon ni hajolmaon porini sonaha kekuatanni, songon bom atom, bom nuklir pakon na legan. Lang boi talu hajahaton ni tonduy-tonduy ai. Sabalikni do songon na lambin monang do ia mamakei sinjata ni manusia. Tonduy-tonduy hajahaton in do tene na mamakei haganup laho parsedahon jolma. Halani ai do ase isuruh Apostel Paulus Kuria Epesus ase ipakei sidea sinjata na humbani Tuhan. Aha ma sinjata na humbani Tuhan? Ai ma sinjata partonduyon. Tonduy na humbani Naibata do boi manaluhon tonduy na humbani hagolapan in, ai ma setan-setan na markuasa i awang-awang. Majangin tumang do hajahaton ni setan-setan in. Seng dong pagoluhkon pakon padameihon hita samah hita. Seng boi padameihon hita pakon Naibata simada hita, tapi na paingorhon hita do dompak Naibata.

I tongah-tongah ni parporangan na hebat do hita sadokah i dunia on. Songon tentera ni Kristus hita maningon jongjong totap marsinjatahon sinjata na humbani Naibata ase dapot hita hamonangan bani ujungni. Tentera i parporangan lang boi putus hubungan hubani markas besar. Jadi markas besarta ai ma bani dolog batu. Ijai do ipajongjong Tuhan Jesus kuria-Ni na so tartaluhon horbangan ni nagori toruh. Halani ai maningon totap hubunganta bei bani Tuhan Jesus Kristus na dob marhamonangan manlawan rajani hagolapan in.

Pakei nasiam ma pakeian sinjata na humbani Naibata, ase boi tahan nasiam dompak akal-akal ni sibolis in.

**Tonggo:** *Ham Tuhan Jesus Kristus, Ham do ulunami na dob marhamonangan manlawan munsuh sibolis in. Dihut ma hanami ganup pamonang Ham. Marhitei sinjata na hum Bamu ai ma hata-Mu na dob iberehkon Ham bennami bahen sinjatanami. Amen.*

HALELUYA NO. 114:3-4

3. Seng dong tarpangajamkon  
pargogoh diri da.  
Ai seng dong in margagan  
anggo bai Naibata.  
Ai sihol bereon-Ni  
do bam sinjata-Niin;  
Ai seng tarbaen lang talu  
munsumu baenon-Niin

4. Taronkon rahanan da,  
iparsahitan in.  
Podas do in marpunsa  
ibaen Tuhanta in.  
Ibere do gogohmu  
hubam manaron in;  
Ibaen ma ho gamot-Ni  
bai Harajaon-Niin.

ISE DO NA TOTAP?

**"Ia Yesus Kristus totap do, sonai nantuari, sonai do sadari on, lanjar sonai do ronsi sadokah ni dokahni."**

**Heber 13:8**

Ganup do hita mangidah pakon mangahapkon na marubah-ubah do sagala na masa anjaha doras do parubahan in. Tarlobih bani negara-negara na hinatahon negara yang sedang berkembang songon hita on. Cepat do parubahan ai. Age pe bani negara na dob maju mardalan do parubahan ai. Tapi ulang pala longang uhurta sonai do torus das hubani ujung ni sagala ari. Ase domma sifat ni na tinompa in maningon marubah-ubah. Pitah Sipanompa in do hansa na so marubah, na totap humbani mula ni mulani ronsi sadokah ni dokahni. Jadi maningon mulak hubani na manompa do na tinompani in. Haganup towod maningon manambah janah haganup pamangan marhatongonkon Yesus Kristus do Tuhan bahen hasangapon ni Naibata Bapa i Nagori Atas.

Jadi sonaha ma sikapta bani panorang on sebagai halak Kristen. Ganup ari do ayubkononta dousanta hubani daroh ni Tuhanta na dob madurus in. Ase borsih hita halani hasasapan ni dousanta, janah manggoluh i lobei ni Naibata na mapansing ai. On ma sihorjahonon ni haporsayaonta ibagas pangurupion ni Tonduy Napansing. Ai haporsayaon lang mintor gok dear humbani mulani hita porsaya, tapi berkembang do ai, halani humbani haporsayaon do tubuh haporsayaon, ase lambin matoras haporsayaonta dompak Tuhanta. Tujuanni lambin taridah ma buah-buah ni haporsayaon i tongah-tongahta ganup ari na gabe hasangapon bani Tuhanta.

Bani pargilumbangon ni dunia pakon parhalisungsung ni logou bolon laho mandorab solunta maningon tonggoronta ma alatan na totap ai, in ma Yesus Kristus na dob mambere padan hubanta: "Sai hasomanan-Ku do hanima ganup ari paima marujung dunia on." Maningon dong homa pandang situjuon na totap banta bani pardalananta ase ulang kahou hita i tongah dalan na marluhik-luhik on. Jadi totap ma hita bani padanta dompak Tuhan, songon Ia na totap mandalankon padan-Ni dompak na hinaholongan-Ni.

**Tonggo:** *Ham Tuhan Yesus Kristus Tuhannami, Ham do Tuhan na totap. Urupi Ham ma hanami marhitei Tonduy-Mu ase totap boi idalankon hanami padannami, ase marsangap Ham marhitei horjanami. Amen.*

**HALELUYA NO. 135:2+6**

2. Simole-ole songon sanggar  
hasoman na i tanoh on;  
Tongtong do Jesus na tarsulur,  
Huan-Ni pe jonam tongtong.  
Ai pe baen hita Jesus in  
tongtong huan-huanta in.

6. O Jesus, huan-huannami,  
sai tangkap tangannami on.  
Tongtong rajai ma uhurnami,  
hu surga boan hanai on.  
Ijin ma tong parsaoan in  
sadokah ni dokahni in.

SORTALI HAGOLUHAN

“Ulang habiarhon sagala sitaronon, na sihol roh bamu. Tonggor ma, dabuhon ni sibolis ma atap piga nasiam hubagas tutupan, ase iuji nasiam anjaha marsik ma nasiam sapuluh ari dokahni. Sai bujur ma ham ronsi matei, dob ai berehonon-Ku ma bamu sortali hagoluhan ai.”

Pangungkabon 2:10

Haporsayaon na tahan uji ai do na dapotan hamonangan. Boi do idahonta bani Bibelta piga-piga parhaporsayaon na tahan uji. Si Abraham na totap mambalosi Naibata bani goluhni. Si Job na totap marhatengeran bani Naibata age pe sonai banggal ni sitaronon, parlajouan na roh mandorabsi. Monang si Job. Na monang, ai ma na bujur ronsi matei bani ma sortali hagoluhan. Ipaingat hata on do hu banta ase ulang mabiar mandompakkon sitaronon na sihol roh. Bujur mangkagoluhkon Hata-Ni bani haganup pardalanan ni goluhta, lang ra ipengaruhi situasi, lingkungan, lang marnombas-nombas. Bani panorang malas ni uhur, pusok ni uhur totap adong pardomuan atap kontak dampak Tuhanta. Bujur ronsi matei na mararti do ai roh hu parmingguan lang martorap-torap, seng pitah sanggah pandidion, atap Natal pakon Tahun Baru. Bujur ronsi matei mararti do ai sedo Kristen terdaftar hansa.

Nini na marpambotoh: “Goluh on ai ma perjuangan janah dunia on ai ma arena pergumulan.” Songon si Jakob berjuang, janah margumul i bagas goluhni halani ancaman na roh humbani saninani si Esau. Janah hadobanni margumul ia pakon Naibata. Lang mabiar si Jakob margumul, janah hadobanni monang ia. Sadokahni on mabiar ia mangidah saninani si Esau tapi halani iurupi janah ipabayu Naibata ia magou ma biar ai. Janah ase boi monang bani perjuangan, pargumulan ai ma totap mangadongkon hubungan pakon Tuhanta, janah dapotsi ma sortali hagoluhan. Sihol monang ham bani ujian ni goluhmu? Ingat ham na monang do hansa jumpahan sortali hagoluhan.

**Tonggo:** *Ham Tuhan Naibata marhitei Jesus Kristus Tuhannami, urupi Ham ma hanami bani goluhnam i ase ulang mabiar hanami. Porsaya do hanami Ham do hansa na boi pamonang hanami. Amen.*

HALELUYA NO. 179:1+4

- |                                                                                                                                                   |                                                                                                                                                       |
|---------------------------------------------------------------------------------------------------------------------------------------------------|-------------------------------------------------------------------------------------------------------------------------------------------------------|
| 1. Ise do ganup sidea<br>i lambung ni Naibata;<br>Marsortali do hudidah<br>marsinalsal do homa.<br>Ganup do mandoding bei<br>Sai riap mamuji bei. | 4. Na mandoding do sidea<br>pasangapkon Jesus in;<br>Na tangkas ijin ididah<br>sintong ni Hata-Ni in.<br>Na pinarbagah-Ni in,<br>ondos do ganupan in. |
|---------------------------------------------------------------------------------------------------------------------------------------------------|-------------------------------------------------------------------------------------------------------------------------------------------------------|

MARTARIMAKASIH

**“Dingat nasiam ma na mambobahon nasiam, na mangkatahon hata ni Naibata bani nasiam; ujung ni pardalanan ni sidea ma tonggor nasiam, anjaha tiru nasiam ma haporsayaon ni sidea.”**

**Heber 13:7**

Nini pepatah: Panas hari lupa kacang akan kulitnya. Tontu bingkas ni pepatah on pe halani na adong do na lang mambotoh mangatahon tarimakasih. Bani panorang on pe dong do na “lupa kacang akan kulitnya.” Martambah-tambah pasu-pasu bani goluhni, tapi ai do use padaohkonsi humbani Naibata. Ibere Naibata panorang idop ni uhur banta, tapi gati ipakei hita panorang idop ni uhur ai domu hubani na lang hinarosuhkon-Ni, atap goranon ma ai na salah pakei bani pasu-pasu. Dob madear ia, lang itandai be hasoman na manogusi hinan.

Patut do manghatahon tarimakasih hita tongtong bani goluhta bani Naibata marhitei idop ni uhur na ijalo hita bani ganup panorang. Martarimakasih bani Naibata halani holong ni atei-Ni das hubanta Ambilan Na Madear. Golap hinan do hita Simalungun tapi dob honsi das Ambilan Na Madear in lihar ma panonggorta. Hinan sedo bangsa ni Naibata hita, sonari bangsa-Ni ma. (1 Petrus 2:10) Setiap tanggal 31 Oktober tontu taringat do hita hubani tokoh reformasi Dr. Martin Luther na mangadongkon pambaharuan i tongah-tongah ni kuria. Na barani manaksihon hasintongan bani na hurang sintong.

Marhiteihon ni reformasi on ipaingat homa hita ase dihut ipabayu hita dirinta. Na sirsir pabayuhon hauhuranni, pakon goluhni ai do na margoluh na baru songon na hinarosuhkon ni Tuhanta. Haporsayaon do na gabe bohal atap gogoh banta. Ningon barani do hita pataridahkon hasintongan, tanda ni na dob dewasa haporsayaonta. Patut ma hita mangkatahon tarimakasih bani Tuhanta bani idop ni uhur-Ni na ijalo hita mardapot-dapot.

**Tonggo:** *Ajari Ham ma hanami Tuhan tongtong martarimakasih Bamu, sonai age mamakei pasu-pasu-Mu in. Patoguh Ham ma haporsayaonnami. Amen.*

**HALELUYA NO. 132:2-3**

2. Tarima kasih ma  
Bamu, o Naibata,  
parlayak Ham!  
Sibahen dalam in  
marhitei Jesus in  
hu Surga in.

3. Andohar ma holong  
ateihu, sai tongtong  
bujur Bamu.  
Age huja pe au  
sai hasomani au,  
sonang tumang.